

楹書隅錄續編

楹書隅錄續編卷三目錄

子部

明銅活字本二

校本四十三

鈔本一

楹書隅錄續編卷三

聊城楊紹和彥合

子部

校明鈔本鹽鐵論十卷一冊

禎游學宮時得漢廬江太守丞汝南桓寬次公所著  
鹽鐵論讀之愛其辭博其論覈可以施之天地國家  
非空言也惜所鈔紙墨歲久漫漶或不能句有遺恨  
焉迺者承乏江陰始得宋嘉泰壬戌刻本於薦紳家  
如獲拱璧因命工刻梓嘉與四方大夫士共之宏治

辛酉十月朔日新淦涂禎識

嘉慶癸亥蕘翁屬閱一過就所見標於上方此書明代屢刻俱遜於搜甯齋鈔本然誤處仍多惜不得宋元舊槧一掃風庭之葉也嘉泰壬戌本見宏治辛酉涂禎跋中不識尙在天壤間否顧千里記

均在卷首

太元書室刊本校甲寅除夕前一日澗蘋記

校畢時未及一更新月半規天光潔淨令人添靜意幾許蕘圃氏

右鹽鐵論十卷係活字本余借顧澗蘋影寫本傳錄

者原本出於洞庭鈕匪石之友所藏其用以校活字  
本者則又瞿氏所藏太元書室本也雖經校勘譌字  
尙多俟以舊鈔本正之棘人黃丕烈

嘉慶癸亥夏用搜甯齋書鈔本校與太元書室刊本  
甚近然首有都穆序謂刻於江陰其作序年歲又同  
出宏治辛酉而實勝活字本未知何故丕烈校竣書  
通本用墨筆於藍硃二筆上是者加圈非者加豎兩  
存者加點疑者不加圈點庶兩本佳處譌謬者亦不  
掩矣端陽日蕘翁記

以上各跋均在末卷後

校宋本韓非子二十卷二冊

向從郡城周香嚴家借得張鼎文本韓非子雖明刻然頗近古已屬余友顧澗蘋臨校於趙本矣去年在坊間購得此刻取與所校張本核之多合固知其爲善本也然究未知其本之何自出爰假貞節堂袁氏所藏道藏本手校一過見卷中有同卷字又有虧四記號乃知亦自道藏本出故大段尙好惟字句間有不同想是校改重梓所致與道藏猶不盡合新歲杜門謝客竭三四日力而校讎至再今而後道藏本之

面目纖悉無遺趙本云自宋本出澗蘋又爲余校臨  
諸本於上取兩本讀之信可爲參互考訂之助爾壬  
戌春正月九日黃丕烈

以朱筆校道藏本此壬戌春間事也旣於是年秋獲  
影宋本復手校首幾卷旋即中止蓋影宋雖出自述  
古而此外又有宋刻本適借諸他所手校於影宋本  
上其異同尙多不暇悉臨校於茲也今長夏無事取  
所有子書次第校勘淮南列子二家已從宋刻精校  
此猶少副本因復續取校宋刻影宋本傳錄於此道

藏本與宋刻本互有出入當參攷而鉤其中可耳丙

子六月下弦復翁

均在末卷後

書必真本爲上其次從真本手校乃可信蓋手校真本止隔一層卽如此本余於宋刻藏本兩皆親見真本似可爲信矣

韓非子別有顧千里爲余手臨諸家校本在趙本上然諸家所校宋刻及藏本今取以勘余親見之宋刻與藏本皆不同余故云手校真本乃可信也

均在卷首



校元本宋提刑洗冤集錄五卷二冊

洗冤錄舊刻不多見得見覆刻本已鮮世傳者非其  
本書矣余家舊藏宋提刑洗冤集錄五卷前有聖朝  
頒降新例幾條載大德云云故定是元刻茲胡文煥  
覆本文理略同殊多脫誤且改易卷第因手校之庶  
可讀也復翁

明人喜刻書而又不肯守其舊故所刻往往戾於古  
卽如此書能翻刻之可謂善矣而必欲改其卷第添  
設條目何耶余向檢也是園書目於律令門載有洗

冤錄一卷無冤錄一卷平冤錄一卷茲從此刻考之  
殆卽指是書也蓋書分上下猶是一卷耳故目云一  
卷也無冤平冤亦胡文煥刻余與此錄併得之丁卯  
秋九月黃丕烈識

均在  
卷末

一

校明鈔本靈臺祕苑十五卷八冊

此靈臺祕苑十五卷係明人舊鈔雖有舛誤尙可是  
正近從馬鋪橋周香嚴家借得騎龍巷顧氏鈔本各  
卷參差不一與舊本序次無相合者舛誤處竟莫可  
是正矣舊鈔脫房星釋文一條從周本補足卷十三  
羽林軍後脫葉因序次不對難以補入姑就舊鈔目  
錄按顧鈔本而傳錄十一條未識是否當俟善本正  
之乙卯三月棘人黃丕烈

端陽前二日書友吳東亭示一新鈔本急檢卷十三

文惟鈇鉞一條及王良一條與顧鈔本有歧異者因  
文理稍勝竟從新本膽清於卷中素紙餘條亦間參  
兩本正其舛誤焉薨圖氏

均在末  
卷後

校明鈔本畫鑒一卷一冊

嘉靖乙丑春三月十三日鹿田居士史臣紀勘畢

隆慶三年首夏顧玄緯載勘計四十葉

夏六月小暑日皇山七十五翁姚咨又校一過

乙丑歲有書賈吳姓者持是求售予因以

下闕

錢易得

下闕海虞馮彥淵記

均在卷末

吳郡姑餘山人沈與文校勘

在卷首

此冊余舊藏有年矣歷經名家收藏并手校一過頃從坊間又獲一舊鈔本出自郡中賜書樓蔣氏雖譌

舛特甚而字句間有可爲此本校勘左證者悉用別紙粘於上方舊時校語亦粘於別紙卽書校語於後註云蔣本續校者皆余筆也古人審慎多作意揣之詞故未便輕改茲得別本爲據可釋然無疑矣閒窗枯坐破一日工夫校此於百宋一廬之北窗下時濃雲密布天意釀寒一種清冷之致頗自得耳辛未冬至後四日復翁識

在卷末

版心有野竹齋校刻五字卷首末有姚伯子手校印上黨馮氏藏本馮彥淵收藏記容十姑餘吳岫家藏

方山濠南居士姑餘山人沈與文印各印記





校舊鈔本衍極五卷一冊

至正二十六年歲在丙午八月庚戌朔寫起至十有八日丁卯鈔畢於泗北村居映雪齋華亭孫道明叔識時年七十歲

宏治丙辰十月十二日吳山盧雍謹錄於長洲烏鵲橋寓所

康熙二年癸卯三月予僑寓吳門半塘偶過訪金孝章出示此書猶是吳匏庵先生家藏本也得未曾見喜而借鈔酬應之暇繕寫竣事始三月二十一日畢

四月初七日通計一十六日老眼雖昏魯魚稍訂後之覽者尙毋忽諸江陰周榮起識時年六十四歲周榮起字硯農江陰老儒書多手鈔精六書之學毛子晉刻校古書多其刊正年八十七乃卒子長源字鄴侯亦文士二女曰禧祐皆工畫禧名尤著云吳翌鳳附志時年丙午四月四日雨窗

衍極以五卷者爲佳明神廟時刻猶如此近傳二卷非其舊矣讀書敏求記云龍溪令趙敬叔爲之鋟梓以傳今攷陳衆仲書云又喜趙龍溪之能篤意於斯

文然後喜著書者之託以不朽也則此書在元時當有刻本世所傳者不過明刻耳此冊尙是元人鈔本錄出翫吳枚菴跋識是康熙時人周硯農手鈔余所藏明刻本當遜而居乙惟卷端有李齋序一首明刻反有爰補錄備覽云嘉慶甲子六月念日識於百宋一廬之北窗黃丕烈

越歲庚辰於坊間見有藍格舊鈔本係從宏治時能靜元孫正隆重刊本鈔出者取對此鈔實有脫失急爲手校其異於周本上周本雖鈔自元人錄本然正

隆所據必非無本故不憚損汙此本俾文得其全也  
復翁

凡書不可不細校一通第就其外而觀之爲某本勝  
於某本此非定論也卽如此書先得明刻本後得名  
人鈔本卽定爲鈔勝於刻此殊不然余向時卻未敢  
以明刻校名鈔近得舊鈔遂取以校鈔本知脫失有  
在明刻所有者則鈔所自出本無也但文取其備因  
悉補之惟是字句之間此或同於明刻或同於名鈔  
是明刻已見正隆重刊本而名鈔出自元人錄本則

所據必元刻故有不同也名鈔本有一二佳字爲其所獨如反汗汗字極佳此字明刻舊鈔皆作反復非矣不知妄作明刻極多神廟時本各書往往如是故余校此本不復記出苟可與舊鈔證明而異乎名鈔者文理較勝偶亦取之校畢復讎因記原委以質來者見獨學人記

均在末卷後

卷首有祕本楊顥之印繼梁吳翌鳳家藏文苑吳枚菴流覽所及各印字法古雅可愛真祕本也



校舊鈔本文房四譜五卷一冊

癸酉二月從吳枚菴借本校吳本初命門生揭濟陽  
生所錄朱本朱本者朱文游所藏拂水蒙叟本也蒙  
叟本從趙清常本對校者徐序是叟手錄蓋卽敏求  
記中所載本也趙清常本借錄孫唐卿本當枚菴錄  
是書後復從李氏借得錢蒙叟原本及趙清常原本  
親爲校勘以朱筆注錢黃筆注趙并錄趙錢兩人之  
跋於後今余臨校但注錢趙而已此本得諸海鹽家  
叔升所云筆之詞賦又每譜詞賦及易簡後序皆有

之是爲善本然筆之雜說脫四十五條硯之敘事脫  
九條則又不知何以異也幸賴吳本足之吳本有不  
及此本者詞句間當再爲斟酌耳復翁校畢識

余旣借吳枚菴校本手校此本矣因吳校得知吳本  
所從校者有錢蒙叟本又有清常本蒙叟所取以對  
校者兩本皆出同郡朱文游家余識朱丈時其書大  
半散去且余亦未及搜訪至此等書籍故是書亦無  
從問訊及見吳跋云云乃思文筆惟郡中周丈香巖  
收之最多因往訪之果有錢蒙叟本序係蒙叟手錄



通體朱墨兩筆校勘亦出蒙叟手跡洵奇遇也顧有疑焉枚菴前借諸朱丈者的係真本吳云錢對校趙清常本并有跋今周本無蒙叟跋亦不見及趙本一語豈所謂錢以趙本對校者其詳載趙本上前枚菴借時錢趙兩本都見故得知其詳耶惜趙本未爲香嚴所收而其詳不可得聞矣最有異者枚菴云錢作某今證諸錢本不合者亦甚夥抑又何耶俟持周藏錢本還質諸枚菴想必有以核其實也錢本究係鈔本不無疑誤余此時專校錢本故無論是否之字錢

本合於此鈔原本合於吳校本者皆以墨筆圈之或識其字於上下方所以徵信也若斟酌是非旁引曲證或卽就本書他處引用及別書所載者祛其誤而存其疑是在讀者用心可爾癸酉暮春廿有五日復翁

廿又六日續借吳枚菴本知錢跋果在趙本此錢原本本無跋也

書史會要云蘇易簡字太簡梓州桐山人官至知陳州贈禮部尙書風度奇秀善筆札

馬端臨文獻通考作文房四寶五卷今人俗諺尙有  
此稱理或然歟

吳枚菴本跋二通

朱文游所藏拂水蒙叟本甚爲精審予六七年前嘗  
見之濟陽生從朱本錄出奈胸無點墨浪作鈔胥遂  
致齟齬不可卒讀丁酉春日命門生搨之惜文游養  
疴閉關未由借其原本一校讐也明年仲冬九月枚  
菴漫士識於東城寓舍

又明年初夏文游出示拂水原本云蒙叟從趙清常

本對校者卷首徐常侍一序是叟手錄閱之譌脫依然殊失所望略正數字再識於此湯士又書

是夏六月文游丈復以清常原本見借校正數字廿五日枚菴記

趙錢兩跋

文房四譜四卷戊申八月中友人孫唐卿氏自家山來奚囊中持此書因借錄并校其譌者無慮數十續檢得徐騎省集中有是書之序不知何年失去今錄如前可謂洛浦之遺矣時萬厯三十六年九月十三

日海虞清常道人書於柏臺公署

文房四譜五卷此本闕二卷筆之詞賦又每譜詞賦俱闕又脫易簡後序非完書也丙寅五月牧翁記

廿五日校畢錢本殊多疑誤之處因重向枚菴借伊校本覆勘始悉枚菴所校有不盡出錢趙兩本者蓋伊亦以錢本爲譌脫依然殊失所望略正數字也則余所臨校之吳本非特錢與趙不可分辨且吳之校出於兩本外者亦不甚區別故重以吳本續校卷中云續案又云吳本者吳鈔之本吳校者吳校之本皆

非出於錢趙兩本也并補錄諸跋以備參攷時癸酉  
三月廿又六日復翁

舊鈔本硯箋四卷二冊

硯箋四卷刊入揚州十二種中舊刻無有也去年曾見兩鈔本一則陸東蘿得諸冷攤者一則陳仲魚鈔諸友人者陸本旣歸余遂借陳本校陸本似實有不  
同處然陳本與揚州本爲近未敢信陳本而疑陸本也頃五月下旬余世好顧侍萱茂才出其家藏毛校本託余轉付裝池因得借校大段與陳本合而卷二硯說門石性堅賦如玉條脫小注蔡帖二字起至唐中世以前條未甚貴三字止適多一葉蓋揚州本與

陸本皆改易行款故不知其闕失即陳本行款似與顧本同亦不免脫此一葉也時侍萱將游武林思攜贈百硯齋主人未敢請歸余其還書札有云余之得遇此書固余之幸此書之得遇余亦此書之幸謂此一葉苟非余表而出之不幾歸湮沒乎是實余區區愛書之心有以致此奇遇也迨侍萱自武林歸會面者數矣彼此不復及前事適鄉先輩陸西屏著有續硯箋留在案頭侍萱曾見之後中元日晚涼時來候余欲借陸書因言及毛鈔硯箋所贈之人未之受尙



留篋中余未及待其詞之畢而卽要之曰余有陸本  
又有揚州本任君所欲攜一本去毛鈔本斷斷乎其  
必歸余蒙允翼晨相贈余迫不及待急遣奴踏月相  
索彼此作書往復極一段情話不可無以記之爰著  
其顛末如此至於此書旣去復來以愛硯者而不愛  
說硯之書卒使愛書者終有之殆有數存乎其間不  
可令人思議已嘉慶十七年歲在壬申中元後二日  
書於學耕堂求古居主人黃丕烈識

卷一誤書卷二癸酉元旦偶重展始知之蕘翁記

題毛鈔本硯箋

得箋字禁押本事

求書踏月遞長箋窺祕華陽有洞天勝是多金遺舊  
物珍其完璧愈新鐫手中葉展奇真絕心上花開喜  
欲顛添得硯箋及硯史護持神物想琴川復翁湯筆  
偶檢述古堂書目文房門高似孫硯箋四卷一本宋  
板因知此書宋板尙留人間也余於古書因緣甚好  
或再遇宋板以鑒我欲乎書此期之再按此本係舊  
鈔而毛藏者前云毛鈔本誤也并記七月晦日復翁

又識

均在末  
卷後

有子晉汲古主人楊灝之印繼梁各印記

校明藍印銅活字本墨子十五卷二冊

墨子向無善本往時顧抱沖訪書海鹽張氏曾得明藍印本歸其從弟千里歎爲絕佳自後卻無所遇因從千里借吳匏菴鈔本傳錄一本以備誦讀頃周香嚴有伊親託售之書內有藍印墨子遂乞歸余其來札云此刻與畢刻稍異彼據道藏本此出自內府皆本於宋刻未易優劣也余復取吳鈔本相勘大段相同而鈔所自出雖未知其何從其年代較先於此或可互證也家藏子書極多宋刻惟晏子墨子皆明本

之善者是可喜已嘉慶丙辰春三月七日從友人齋  
頭賞牡丹歸燒燭書此蕘翁

丁卯春以養疴杜門因假袁氏五硯樓所藏正統十  
年十一月十一日道藏本手校此刻其異同甚少也  
香巖云此出自內府恐未必然蓋亦據道藏本也道  
藏本每卷標題下有沛一等數今悉記於卷尾復翁

黃丕烈識

二跋均  
在卷末

丁卯秋續得嘉靖癸丑歲春二月吳興陸穩敘刻本  
與此差後一年而陸敘中有前年居京師幸於友人

家覓內府本讀之語知香嚴以爲此從內府本者非  
無據也陸敘又云別駕唐公以博學聞於世視羣暇  
訪余於山堂得墨子原本將歸而梓之是又一本矣  
今取唐本以勘陸本殊有不合知陸所云唐得墨原  
本者非卽陸本也陸本出內府唐本出道藏殆不謬  
矣惟陸本無敘唐本有陸之序後人遂疑唐本出自  
陸本其實陸刻先一年唐刻後一年實不侔爾秋九  
月六日復翁在卷首  
此本於光緒癸未公車北上爲  
潘文勤師借校未還文勤沒遂  
不可復見  
保彝附記

校舊鈔本墨子三卷三冊

讀書敏求記載潛溪諸子辨云墨子三卷戰國時宋大夫墨翟撰上卷七篇號曰經中卷下卷六篇號曰論共十三篇據此則是書兩行於此者也蓋墨子十五卷道藏收之余所藏嘉靖時刻有二本皆十五卷取道藏本勘之無大異者惟此字句間有不同當必所自出殊矣丁卯九月三日燈下記復翁

校舊鈔本鵲冠子三卷三冊

案中卷缺文二處一取道藏本補之行款卻合一道  
藏本僅空二格此空二十三行半且多地府幽陰之  
謂六字小注於若陰陽云云白文前當非無據也或  
此舊鈔在宋刻上寫下實見空此幾行而道藏僅空  
二格且去地府云云小注或以意爲之或所據本異  
也安得更古於道藏之本在取以相證乎復翁在  
卷  
後

余得此舊鈔本鵲冠子三冊藏諸篋中久矣其同得



者尙有墨子上中下三卷因其鈔手尙舊故備插架收書二十年從無善本可對且蠹蝕塵封幾同下駟頃借袁氏五硯樓各種子書道藏本手勘同異遂及此書行款大略相同譌舛更甚世無宋元善本道藏其先河也惟所缺道藏每空二格此或注元缺字或空幾葉幾行其鈔所自出必非道藏或自古本出亦未可知存疑可爾丕烈

己巳仲冬十有四日訪寓公張涵齋學士於葑溪余與涵齋別已三四年矣茶話移晷極談古書各種源

流涵齋臺而好學於子書尤所究心因及鶚冠子謂

近刻不全備偶於通雅中所引環流章譬若東西南

北之道

多濫首不足益以累重  
噫意爲模共十二字接

蹈然其爲分等也知

余有舊本并校道藏者屬爲檢閱余歸視之此本未  
有卽道藏亦無之通雅疑誤也且譬若作故亦互異  
我輩墨守舊本餘俱非所知故著之是冊雖校道藏  
然已不可多得壽階於今茲將道藏諸本悉歸芸臺  
中丞而外間無有藏道藏者可不寶之哉壽階秋初  
得疾於杭八月初歸卽去世後日已百日矣重閱此

書不勝人琴俱亡之痛復翁

均在末  
卷後

校宋本劉子新論十卷一冊

殘宋劉子新論有注本藏孫伯淵家余從之借校於舊鈔道藏本上缺首二卷以明刻本補之明刻與道藏本殊異反與此程榮本同而三卷以後此又不同於宋本是未知所據云何也茲復用宋本專校正文於程榮本上俾知宋本佳處至宋本之注因與此不同未暇校也且有正文小注校本在舊鈔道藏本上故此從略焉壬申端午後一日西賓陸拙生以書歸

進復翁記

在末卷後



校宋明鈔本劉子新論十卷三冊

晁氏讀書志云齊劉晝孔昭撰唐袁孝政注凡五十  
五篇言修心治身之道而辭頗俗薄或以爲劉勰或  
以爲劉孝標未知孰是庚午巳月晦日葉子寅讀識  
辛卯夏五月十七日晨窗見太翁外舅圖記此冊有  
外舅圖記內子圖記補印

此書丁丑冬得之梅花館越宿卽取去庚辰秋再見  
之南樓如逢故人亟攜之歸內鈔錄多誤硃筆已校  
正至劉子姓氏南陽先生雖言之而終無的據當以

俟知者世無刻本可勿珍諸康熙庚寅中秋十八日

許心展識

均在卷首

此亦五硯樓書也因舊鈔檢出之不令隨他書去卷  
端題劉子卷下又有無一至無十字號其爲藏本出  
無疑惜五硯主人在日未取藏本勘之爲一恨事而  
藏本早售去茲無從借校又一恨矣我友周丈香嚴  
家多祕書向假得活字本校如右其硃墨兩筆舊校  
者都合余茲校活字本是者存之非者不贅焉讀是  
書者以舊鈔爲主活字參之可耳嘉慶庚午五月一

日校畢時在支硎道中復翁

在末卷後

此書世鮮刻本惟程榮漢魏叢書本有之然脫誤甚多不可據也是舊鈔以他書道藏本證之每葉二十行行十七字其自藏本出無疑不知何故正文與注或錯出或譌舛舊校而外又賴活字本校正無算可知書非宋刻可據者十不一二也余向從萃古齋見一小匡子細字本主人云是宋刻惜亦不全後聞爲陽湖孫伯淵售去當致書山左向彼借校一破羣疑讀書在廣見博聞余謂藏書之道亦然藏而能讀非



見聞廣博不足以奏其功焉庚午五月十三燒燭重

檢復翁又記

在卷首

壬申四月假得孫淵如觀察所藏小字殘宋刻本手校一過首二卷全缺他卷亦多脫葉復翁記

宋刻分卷與此異其十卷則同所異在每卷分合

宋本二冊見季滄葦延令書目題云劉子二新論孫氏五松園所藏卽此本今借校於此本上其勝處固多其脫誤處當以藏本活字本參之

是書校宋本不憚至再至三每校一次卽得譌字幾

處書之難校埽葉拂塵可謂至論四月十八第三次

校畢記

均在末卷後

宋本劉子新論跋

劉子新論十卷南宋板本陶大使所贈予見子彙本作二卷無注又有孫鑛評本文不完題播州袁孝政注以孝政官爲地名謬甚但自清神至專學注文反多於此本不知何故宜細考宋題劉勰者仍唐志之舊與明人逕題劉晝者殊無足怪也孫星衍記於金陵五松園

宋本

裝潢

號二冊根

題籤

劉子新論

朱板神品

圖書

第一冊

子

鑒定法

在明刻

第一葉

補缺目錄

季印

滄

在明刻

補缺目錄

沈子

橋印

在明刻

補缺卷

行之

揚州

滄

振宜

在宋刻

卷五第

族

在第二冊

良惠堂

沈

鑒定法

在宋刻

卷六第

一葉

第一二

季振宜

藏書

在宋刻

第六卷

志雅

齋

在朱刻

第七卷

九

趙氏

在宋刻

第八卷

行

竹塢

在朱刻

第十卷

宗

沈文

御史振

葉

第十葉

不計行

伯

私印

宜之印

葉

數

目錄二葉

卷二

以上皆明刻

卷三計十葉內脫第

八

卷四計十葉內

卷五計十

卷六計十葉內

卷七計

卷八計九葉

卷九計八葉

卷十

計十葉全

內脫第六葉

第二第三

第四

十

無鈔補

版心

白口上記

小耳

記每章章名於每葉

校宋刻畢復記宋刻面目如右

在卷首

余好古書無則必求其有有則必求其本之異為之

手校校則必求其本之善而一再校之此余所好在

是也年來家事攪心漸奪余好其興少衰未有如今

茲之甚者日坐齋中身閒心忙視書無一字可入肚  
雖流覽之殊無所得也古人謂凡人爲一事到成就  
處必有魔來擾之此其是耶此書因讎校留案頭三  
年矣因記愁緒於此復翁時癸酉五月二十有六日  
三男生有一載矣能讀父書者賴此子

嘉慶丙子閏六月因收得道藏本黃帝八十一難經  
句解內有缺葉遂托穹窿道士向元妙觀借藏本補  
鈔且云藏本如欲借觀不妨往取余於鈔補竣事後  
開一目去復檢得數種原有者校之不全者補之卷

帙少者擬次第傳錄之此劉子原出道藏惜有錯誤  
先經前人以朱墨二筆校勘及入余手復取活字本  
殘宋本宋缺補以明刻本校正文及注取子彙本校  
正文幾於火棗兒饒矣

茲則專取道藏原本覆勘之始知此舊鈔本實出道  
藏惟稍有脫落耳卽活字本宋刻本正文及注亦未  
必大有歧異不知所補明刻二卷出於何本其注多  
少互異茲旣得見道藏真本自然以此爲主而以活  
字宋刻兩本參焉明刻之二卷斷不可據正文子彙

本極佳可取證也所校道藏皆標於下方以藏字注於字下通體於本行文字詞句有經宋本活字本明本及前人朱墨二筆校改增損者不復再加區別惟視下方無道藏本標出者皆與藏本合而舊鈔之爲道藏固可卽本身字而知之矣至於字體不盡合道藏本未能一一照改也得此番校正後劉子一書可稱善本余之心力幾悴於此八月八日燒燭甘止醒人識

嘉慶十七年四月十四日覆校畢陸雲士記

跋均在

末卷  
後

道光癸未秋日長洲張紹仁借讀

在卷四末

是書世鈔善本宋刻又不易觀賴此尙存宋刻面目  
且歷經前賢手校極爲精審至可寶也卷中有葉子  
寅印春玉圃人葉豹文印葉國華印歸高陽葉氏印  
南陽閨秀葵園高陽葵園藏書葉氏茶竹堂藏書丹  
臣廷樵之印袁氏又愷五硯樓袁氏所藏金石圖書  
印二姪經舍海甯陳鱣觀仲魚審定拙生手校並黃  
氏諸印記



校舊鈔本

蘆浦筆記  
楊公筆錄

一冊

附沈括補筆談二葉均不分卷

此節錄本蘆浦筆記較十卷本爲勝鮑刻知不足齋叢書本雖雖勘精審猶遜此矧其他乎惟余舊藏穴研齋鈔本此勝處悉同此本未可以節文輕棄也復

翁記甲戌九月

在刪面

此舊鈔蘆浦筆記及楊公筆錄初書友攜示余以蘆浦筆記家有舊藏本楊公筆錄未知其書且裝潢狹小殊不耐觀遂還之矣適張訥菴來談及亦見此二種其蘆浦筆記雖非足本然有一二處殊勝鮑刻余

楹書隅錄續編

卷三

三 海源閣

復取回與舊藏本相勘凡舊藏本勝處無一不合惜  
非足本其本之所自出當可信其爲佳耳書之不可  
輕棄如此爰令賈人重爲裝潢而收之楊公筆錄向  
與偕來卽附後云甲戌九月廿有九日晨起雨窗識  
復翁

十月初十取舊藏本校卽穴研齋繕寫本也復翁

均在

冊首

余居城西時惟府東有一書坊所謂敏求堂是也旣  
而由府以至按察司前直至胥門學士街三十年間

書坊之多幾以十數矣元妙觀前向多書坊今亦更盛自余再遷縣橋與觀前甚近故賈人之蹤日盈我門矣是冊出墨林居蓋新開舖子者始以此書來余因其行款甚狹小并閱蘆浦筆記之文多不全還之既得友人之曾見此者指示其佳處而復收之語詳前跋中今日又過觀前諸坊無書可覽惟於學山堂見亡友顧抱沖手閱汪文盛本漢書其中朱墨燦然細審之識是抱沖筆其所閱著筆不多想未經卒業之本或係生前換出故流落坊間忽過余眼倍添懷

舊之思矣憶余於二十年前彼此同好有得輒復相  
示今不得見其人并不得見其書而余之所謂賞奇  
析疑者又大半換一番人時光之速人事之變何可  
勝慨耶抱沖之歿在丁巳年其二子皆髫齡今皆成  
人惜蹤跡久疏難如昔年觀書之便也歸來燒燭見  
案頭有觀前所得之書在記此一段感慨於此時十

月初九二更書復翁

在冊末

校明鈔本西溪叢語二卷一冊

吳郡沈辨之野竹齋校本譌謬尙未盡亦當再讀一過此本雖譌謬殆不可讀然刻本藉之得以補脫改正宏多幸勿忽視之仲老記

西溪叢語最舊爲鴉鳴館刻向聞壽松堂蔣氏得濂溪坊顧氏書有錢曾遵王校本因借校於津逮本上雜諸書堆中檢而失之適小讀書堆有舊鈔本爲嘉靖時野竹齋沈與文所藏較遵王本爲古但不知異同若何復從壽松借之乃壽松又有一舊鈔本止上

卷鈔本亦後於沈本而譌謬亦復不少茲取以參沈本就可兩存者書於此上方錢本可參校沈本者書於下方至於敘次先後壽松舊鈔本略與沈本同錢本敘次倒置脫落亦多遵王悉校之其校正略同沈本卻非出於沈本其跋不詳本所自出故未可知也錢跋別錄附考乙卯秋復翁記

余前校錢鈔本曾借過張訥菴所藏吳枚菴臨何小山校本在鵝鳴館舊刻上久而忘之矣今因得此舊鈔復與訥菴談及重借訥菴本覆之雖臨何小山本

卻與此校本又不同因復校於下方注云刻者何校此本之所從出也又校之未盡者亦注云刻何校於刻本而又不出於此鈔者注云校所以辨異也何校用葉石君所藏嘉魚館惡鈔本正是此本而末云七十四病叟煌記又與仲老記者異矣復翁記

附記壽松堂蔣氏兩鈔本

一藍格本每葉二十行每行二十二字前有序標題下不分卷結尾亦上標書名無卷數按諸沈本實上卷也一黑格本每葉二十行每行二十一字原失序

分上卷下卷上卷計脫七條下卷計脫兩半條一全條皆遵王手補其顛倒處亦以數目先後誌之最後有跋語三行附著於此

己酉清和晦日校於述古堂之北窗雙鉤闌外柳罩池面黃鶯坐溼求其友聲可謂今雨來人不到門矣  
貫花道人錢曾遵王記

按己酉清和爲述古主人詮次家藏書目告成之時述古堂藏書目序可攷彼云佛日前七日此云晦日蓋去詮次時已一月矣貫花道人止見於此殆取龍



龕手鑑序中穿貫線之花語意乎

錢鈔據脫葉之本故脫七條其實脫三條蓋上卷第四十三葉別本原有

附錄吳枚菴臨何小山校本原跋

吳郡沈辨之野竹齋校本譌謬尙未盡亦當再讀一遍

乾隆辛酉三月廿五日用葉石君所藏嘉魚館惡鈔本校亦藉改正云時入夏之六日陰雨不已麥豆之苗爛盡耕者何以爲食可憂可憂七十四病叟煌記

按煌義門之弟號小山行二故又稱仲老云

以上各跋均在

末卷後

古人云校書如掃落葉如拂几塵此言誠然余於是書校至再至三矣而誤字仍有存者因復用吳臨何校本在鵝鳴館舊刻本上者覆校茲始竣事略記面目俾讀者覽焉一校之在上方者舊鈔止存上卷本也一校之在下方者錢鈔本也一校之在下方而注明刻者鵝鳴館本也一校之在下方而注明校者卽臨何校之向據此野竹齋鈔本又參用別本何校之

注明別本及一作本也何校雖據此鈔本而又往往不與此本合或當日之偶有脫落或出於以意去取也今余悉校鵝鳴館刻之與此野竹齋鈔之異同又全載何小山取野竹齋鈔本校於別本異同於此原校野竹齋鈔本之上庶使後之覽者盡得野竹齋鈔與鵝鳴館刻之面目而無遺憾矣昔人留心此書如錢也是翁但得鵝鳴館傳錄之本不及見野竹齋鈔本矣卽有增補大段與野竹齋鈔本合而字句多少全未及此野竹齋鈔本可見聞見之難若是至於漁

洋文鈔已以鵝鳴館刻爲最古又所見之未廣也乙卯中秋前一日燒燭校訖記

續借汲古津逮本校知臨何校之所云別本者往往而合捨此未見有別本專刻者矣十八日又記

以上兩跋

均在卷首

昔漁洋獲此書鵝鳴館刻本上下卷各缺一葉因從汲古刻本補之知二本相同也余前有汲古本校錢鈔本失之不復記憶其異同汲古在津逮祕書中零本倉卒不可得適從理齋農部處借得汲古刻復取

與此舊鈔一對方悉與鴉鳴館刻不甚相遠其脫失處並同偶有一二異字并注下方云毛者是也汲古刻前失自序此不逮鴉鳴館本理齋欲假余鈔本臨校余先校汲古而著其崖略如此中秋後三日燒燭書薨夫

廿有六日理齋借校爲余考證按字一條精確之至因錄其校語於上方余加續案以拜一字之師云復翁又識

續經張訥菴借校此本復爲余校鴉鳴館本得數十

條悉以夾籤附於各條下精審之至亦謹慎之至也  
茲殘歲坐雨百宋一塵中手書於本書各條上方恐  
其久而散失脫落也初菴校書心到眼到手到在朋  
好中無出其右故其書俱善近聞稍稍易出如有得  
之者莫以尋常校本視之因併筆於此乙卯季冬月  
廿有六日復翁

一書讐校幾番來歲晚無聊卷又開風雨打窗人獨  
坐暗驚寒暑迭相催

人亡人得楚弓同寒士精神故紙中多少藏書家具

在姓名不逐暮雲空復翁漫筆

鵝鳴館刻與此鈔序次大有不同此本卻未將刻本

先後校入別有鵝鳴館本在可互證也

以上各跋均在卷末後

卷首有葉萬石君慶增氏孫從沾印袁氏魯望嘉魚館各印記

校宋鈔本賓退錄十卷一冊

此書向倩甫里陳生假汝南氏所藏明代刻本影寫  
照原本讐校無一字不改正今康熙六十有一年歲  
壬寅夏孟書賈王接三持宋槧五冊來索價十金無  
力購之留案二日扃戶屏客細加校勘用朱筆塗改  
宋本內欠七翻未校七翻中必有謬誤之處心殊快  
然通二冊校過者已無魚魯可稱世間善本矣但宋  
本十行十八字計連欠葉共二百有二番此本行格  
不同頗少古意惟一序特於宋本上影寫增入爲可



觀也蓮涇後學王聞遠識於孝慈堂之東窗

此校宋本賓退錄出於王蓮涇家余藏之有年矣此書雖有新刻未敢取信續又得一我法齋舊鈔本因此已校宋不敢取證此頃鮑渌飲以是書毛鈔本屬其子歸余中途爲捷足者得之同得者尙有毛鈔周公謹蘋洲魚笛譜沈冠雲臨惠氏父子校閱本逸周書共十番今欲倚價歸余余之力亦同蓮涇遂效蓮涇故態扃戶屏客細加校閱用硃筆塗改亦竭二日之力而畢毛本云宋本對錄則非影寫矣與王所見

宋本時有歧異而所云二百有二番及十行十八字皆同惟毛仍失序一番爾中所校序次先後及增損字微異未知同此一刻否也俟再訪之丙寅孟夏蕘

翁識

均在末卷後

余收書二十餘年遇故家所散者無論舊刻名鈔及手校手稿本苟可勉力購之無敢失諸交臂卽如此書爲王蓮涇藏校本收之已有歷年今又遇毛鈔本極欲並儲已爲他人所得雖可商然已懊惱矣遂假校於此去蓮涇校時八十五年而前所謂宋本內欠

七翻未校七翻中必有謬誤之處心殊怏怏者今可  
補其闕豈不甚樂然究未遇宋刻仍不敢云通二冊  
校過者已無魚魯可稱世間善本也薨翁又筆

在卷首

校宋舊鈔本學齋佔畢二卷一冊

余收此叢書堂鈔本學齋佔畢殘本二卷藏諸篋中  
久矣苦無善本鈔足頃友人顧子千里從揚州歸攜  
得古書幾種相質有舊鈔足本取而互勘行款已不  
同知非同出一源惜渠本缺序并首卷首葉之前半  
幅賴此補全可爲忻喜翌日往訪周丈香巖云有不  
全宋刻假歸手校知千里本實從宋刻錄出故行款  
多合此鈔本行款每葉少四行行之字雖同是二十  
字已略異矣因取宋刻校此一卷其二卷已屬鈔補

亦就其異同校之未敢信彼是而此非也乙丑八月

二十有六日黃丕烈識

以下各跋均在卷末

復取顧本校多與周本合用墨筆識之鈔本顧周兩本似出一源而周本有不同者皆出後人剝改又與此本合未知此本照周本錄出抑周本反據此本改之古書源流甚是難考聊筆之以誌同異龔翁

此段在右

前跋之

越歲乙酉爲道光五年秋七月二十有六日書友以香巖舊藏此書殘宋刻一卷舊鈔一卷共二卷裝二

冊求售蓋香嚴作古書多分散兒孫有不愛此或并  
藉此先世寶藏聲名挾冊索重值獲利故肯贈人予  
亦重是故友物必勉力購之此時聊厭我欲聊盡我  
情耳安知我之兒孫不猶是耶後之視今無亦猶今  
之視昔何獨於書而廿年之隔老人雖病猶及重觀  
故物亦何幸歟附識於此六十三歲老人薨翁識  
紅格格心有叢書堂三字卷末副葉有明吳匏菴先  
生手訂藏本一行

校本封氏聞見記十卷二冊

康熙丁未仲冬念四日甲子陰窗閱何焯

壬辰四月借蔣氏家藏鈔本校錄一過增補三百餘  
字內何學士暨小山所閱以雌黃墨筆爲別秋厓朱  
邦衡識

道光甲申歲初四日校鐵如意齋藏叢書堂錄本原  
出汲古舊藏中有毛斧季手校燒尾狂謫兩條各本  
所無因取錄於本門上方老堯記

初五日起覆勘畢

均在  
卷末

校舊鈔本塵史三卷三冊

此書脫誤獨多幾不可讀當就沈景倩是正辛未初夏

癸巳仲夏又閱於落小巷中景倩下世十餘年留心書史者絕無其人牧翁所藏數萬卷辛卯二月四日一炬爲盡景倩書庫其子變化無遺校讎路絕矣花

朝前一日顧菴記

兩跋均硃筆在卷首

此塵史上中下三卷係舊鈔而義門先生手校者向與舊鈔之碧雲騶駘鼓錄合裝因遭蠹蝕重爲裝池



而分此種爲三冊其二種別裝又非義門校者故分之也暑窗無所消遣時取舊藏古籍零種繙閱一二頓覺心目一清云嘉慶甲子七月二日黃丕烈識

是書裝成適周丈香嚴過訪問及是書有無別本可校香嚴云有毛斧季校本在余聞之以爲此必義門所云毛鈔者是也旣從香嚴假歸對勘一過疑義門所云毛鈔未必卽此因云毛鈔作某者不盡合耳而斧季卻見此本蓋周本末有斧季跋云從舊鈔三本校一爲何元珙所藏一爲欽仲陽所藏一爲舅氏仲

本所藏余本則欽仲陽藏本矣茲復手校異同於上  
下方不標毛鈔者恐誤義門校也斧季本本與三本  
異謂是別本原作四卷後照舊鈔校正三本同出於  
一而斧季以爲何本最善惜斧季未及細注某本作  
某茲不可辨余謂此本有慶元五年郡守鄱陽洪憲  
重修一條必是傳錄宋本毛本無此且楮墨俱古毛  
鈔不逮欽仲陽本亦可云善義門所校與毛校亦不  
盡合未知又何據矣古書必以刻本爲善一經校勘  
卽失古來面目雖屬聞人動筆亦有一失如卷中集

賢張君房一條倣戒會最五十事本不誤今最校作  
蕞誤甚近惠松崖有漢事會最一書正與此同義而  
反改爲蕞豈非不學無術乎并書以示倣中元前日  
蕞翁又識

余得見何元朗本香嚴之歿已逾百日惜无從再借  
毛鈔本一證爲恨乙卯五月廿九日記

余最喜藏書兼購重本取其彼此可互勘也卽如此  
書收是本後又覆至二本一爲張青芝手錄本一爲  
馬寒中家藏本然皆在此本後無先是者且是書已

經義門校勘非復原書面目卽余所校毛斧季本亦  
不過於義門同時皆非古本也頃書友攜示一舊鈔  
本行款與義門所校本同其鈔手較舊尙留古書面  
目因急收之記其梗概於是尙容續校也癸酉中元  
前一日復翁

城南小讀書堆余故友顧抱沖藏書齋名也抱沖收  
藏與余同時故兩家書互相商確而得之抱沖歿在  
嘉慶之丁巳二十年來欲借觀其遺書而不能得蓋  
始其孤皆幼卽有季弟在以非其所典守故未之許

余幸其尙能慎守弗失可敬也近聞稍稍有搖動之意余亦力絀素所藏者尙不能自保遑問其他乎後探知典質消售俄空焉從坊間得殘零書帳因屬賈人之與往來者檢取數種以爲留存故交遺物之計但開值甚昂不但世好在先未便較量而勉力爲此斷斷不能多收此塵史斧季所云何元朗本適在檢取中因竭一日力將原鈔異同處悉標於上方云何本者是也何本上方及行間有朱筆校語茲并錄之云校某者是也昔斧季所校三本一欽仲陽本已爲

余收一何元朗本又爲余見未及收未及見者止仲  
木本耳書此誌幸何元朗本棉紙紅格舊鈔每葉二  
十行每行二十字首標塵史卽接序文序文後題鳳  
臺子王得臣字彥輔次行低二格標目二行每六類  
爲一行第三行低三格卽標子目後行頂格接正文  
是爲一卷一卷盡又接標目三行每六類爲一行共  
十二類爲二行又五類爲一行皆低一格子目正文  
同前卷式是爲二卷其三卷則空三格分五類爲一  
行十五類爲三行又空四格爲子目正文頂格同前

通三卷計八十四葉與欽仲陽本迥異後亦無慶元一條未知何元朗本又出何本也卷首格欄上有東海二字陽文葫蘆印格欄下有何元朗三字陰文印校者亦不記姓名似斧季而不敢定所校皆云疑者亦小心謹慎人也薨翁

各跋均在卷末

卷首及每冊有青城山人欽仲陽印余懷之印等印

校宋本春渚紀聞十卷四冊

春渚紀聞校宋本在郡中楊氏係毛斧季手校津逮  
本余經借校一本旋爲錢唐何夢華易去續又收得  
一舊鈔本枚菴吳君復臨毛校自以爲盡美矣頃又  
借得一藍格鈔本較勝於余藏爲手校其異讎之至  
再因記至此本之善尙容詳述癸酉七月廿六燈下

復翁識

在末  
卷後

此本紅筆淨校藍格鈔本雖誤字亦盡校出存其面  
目也藍格鈔本向藏郡中某家售諸書賈書賈轉售



諸執經堂張氏一日過訪張君初菴欲向余借是書  
舊鈔本吳枚菴校宋者余問故以新得藍格鈔本對  
急請觀之鈔較舊於余所藏者遂假歸校讎頗有佳  
處蓋行款雖非宋本而與宋本時有合者此可信也  
爰誌原委於卷首復翁

在卷首

師儉堂楊氏藏有毛斧季跋校宋本春渚紀聞余借  
校一過其書後爲錢唐友人何夢華取去後又得一  
舊鈔本所脫與毛本同而行款殊與校宋合余第手  
補目錄未經校勘也茲因借得藍格舊鈔本校此本

覆取楊本再校始知舊鈔多與宋刻不甚遠也凡毛校皆用黃筆毛校亦有朱黃二筆之異復於本處著之復翁校畢識

余校藍格本訖復取毛斧季校宋本覆校卽付裝池謂可了事矣適又借得周香嚴書屋藏紅格本略校一過是書舊藏朱象元曹秋岳兩家亦古本然係鈔本且校者未著所自不敢輕信故未循行細校但取與藍格本毛校本及所刻有異同者校之以見字句之是者當知何去何從耳蓋毛校究係宋本佳者固

當據以見各本之非謬者亦當存以見各本之是悉  
出後人校勘故余不憚再三覆校也癸酉九月十七  
下午校紅格本畢并識復翁

吳枚菴手校舊鈔本西畝草堂陳氏於甲戌十二月

歸去案頭止此一本矣復翁記

均在末  
卷後

嘉慶丁丑仲秋坊友以浦城祝氏留香室所刻書數  
種示余其中有何博士備論及何蓮春渚紀聞余始  
初但見備論取對舊藏鈔本都合知所刻非泛然者  
後因索觀春渚紀聞其後載有拙跋知此刻卽據余

校本而余之校本蓋曾爲錢唐友人何夢華攜去故也末有祖之望跋謂旣刻備論又刻紀聞俾何氏喬梓著述並傳此真盛德事也因記於此復翁

在卷首

余於春渚紀聞讎校至再至三可謂毫髮無遺憾矣閩省且據余校本入刻自謂余不負古書書亦不負余也戊寅初冬又獲有明人影朱鈔本取校毛校時有佳處且可據以證各本之不同而歸於一矣雖譌謬不無大約影鈔時失之或宋本誤也并記復翁

在末

卷後



校宋本卻掃編三卷一冊

徐度卻掃編三卷讀書敏求記云是冊原書爲王伯穀家藏宋刻後歸牧翁亦付之絳雲一燼中矣存此摹本猶有中郎虎賁之想據遵王所云渠所藏影宋本矣今余聞平湖錢君夢廬新得宋本急作書往借之果宋刻本爲書棚本不知與絳雲原本同乎異乎取校毛刻多所是正者首有序文一篇毛所無也影寫補之錢本爲歷來藏書家珍賞玉蘭堂竹塢二印文氏也乾學徐健菴二印傳是樓也季振宜藏書季

振宜字詵兮號滄葦二印延令季氏也宋筠蘭揮三晉提刑三印商邱宋氏也此皆可知者也又有硯田

農一印

閹卽籃字見說文藏卽莊字見說文道光二年仲春日壽鳳識

一印碧

山草堂一印七十二峰深處一印舊學史氏復隱書

印一印碧沁一印舊學圖書一印宋本一印不知其

誰氏矣已上皆鈐於卷中者別有副葉三紙一在卷中首二在卷下首尾紙色古質似是元朝紙每葉面居中鈐印三方一曰徐氏家藏一曰大司馬之章一曰子孫寶之審是元朝人印印文古質彌覺可愛真

古書也是書出杭賈適錢唐何夢華見之云五六年  
前在杭某故家見之惜其時物主不求售故未得今  
夢廬以番餅三十枚得於歲暮云校畢復翁記

余校宋刻後別取古穴研齋繕寫本證之知彼繕寫  
多同宋刻特行款殊耳然有宋刻如此而繕寫異者  
特標之卷中黑筆是也復翁

余居在縣橋蓋臨頓路之東也仲魚來自西而東舊  
學前乃其所經過者余所居非舊學前也舊學基址  
爲長洲縣舊治此縣東橋之得名以此而縣橋又以



爲里名也吳人呼縣橋巷爲懸橋巷余遷此始正之

乙亥夏五記

均在卷末

述古何人舊姓錢向時書籍等雲烟虎賁猶作中郎想摹本曾傳卻掃編

小劫樓頭起絳雲六丁取去世無聞浙中別有儲藏富三卷居然是祕文

懷人異地各聞名一紙書馳兩日程忽爾夜航來遠道開函古豔使人驚

曾留竹塢玉蘭堂卻在文家不是王七十二峯深處

好幾家流轉感滄桑

君家書籍憶臨安多少奇文是宋刊十卷茅亭客話  
本攜來雙璧好同看

汲古雕來穴研鈔弁言一葉並皆拋影樵補闕珍如  
寶不獨奇疑取互交

此詩六絕句爲借校錢氏宋刻卻掃編而作其實未  
題於宋本後也旣而夢廬知有是詩遂寄素簃屬書  
遂書此寄示而余校本亦未附錄入故仲魚借校時  
亦不知有此段情話也長夏無聊出舊藁書此暇日

楹書隅錄續編

卷三

三 海源閣

當與仲魚質證云乙亥六月四日復翁

在卷首

乙亥三月仲魚還是書偶談及夢廬此書近欲與峽石蔣夢華各以所愛物相易將成交矣惜余得信之遲而不及先與之一商也六月四日復翁記

仲魚於丁丑二月中辭世先得諸傳聞後吳蘇閣札來始知凶耗之的待訃不至擬往弔未果案頭所借之書猶未還也二十年來好友一旦幽明睽隔傷也如何偶檢是書爲識數語以寄慨云爾夏五復翁道光三年癸未歲初八日偶憇學士街書坊知夢廬

書籍亦散逸所有宋刻卻掃編已歸富家馬氏不復有相易之日矣越十有八日沈小宛借此還余因記  
蕘夫

嘉慶十九年重九日至吳門訪黃主政復翁於舊學  
前復翁以其手校卻掃編見示蓋從平湖錢夢廬所  
得宋刊本對校於毛刻者復以舊藏穴研齋寫本重  
勘讀其跋尾具見用意之勤余欣賞久之借歸紫微  
講舍適案頭有張氏照曠閣刻本遂取而臨校一過  
其自序一篇張刻卻有不知據何本所錄張刻且多

一跋係嘉泰壬戌邵康作而毛刻及錢氏宋本穴研齋舊鈔皆無之可見藏書不嫌重複也壬戌爲嘉泰二年上距紹興初徐度作此書已七十餘年大約邵跋在尹家書籍鋪刊行之後耳攷渭南文集跋卻掃編云此書之作敦立猶少年故大抵無紹興以後事淳熙己酉十一月書於儀曹直廬按是跋先於嘉泰壬戌計十二年稱其字爲敦立而邵跋則稱仲立殆避光廟諱而改敦作仲歟邵跋中疑尙有誤字今補錄於毛刻本俟更與復翁審定之重九後十日海甯

陳鱣書於向山閣

均在卷末



校舊鈔本霏雪錄一冊

不分卷

霏雪錄明人說部之佳者余藏篋中久矣浙中梁眉子曾一借之是傳錄其副抑藉爲校讎之用皆不得而知也頃試飲堂殘零之書歸於坊友中有刻本遂取校其異板本反有脫落處皆歲久板壞故茲鈔本卻有之想此鈔所據本尙非板子旣壞後所印本也然玩後序似當初原有刻本已失茲刻及所鈔皆非初刻本而重梓本矣刻本多成化時胡謐宏治時張文昭兩跋命孫兒影寫足之時壬午中秋三日寫成



越日晨起書薨夫

末在卷

校舊鈔本洞天清錄一冊

吳丈枚菴多藏祕本大抵皆手鈔手校者久客楚中舊藏書籍寄儲親友所者半皆散逸歸行篋中尙留一二歸家從渠借鈔非一矣洞天清錄集余去歲借歸苦無他本可校繼從坊間覓有胡氏叢書本又以其本不全未卽動手屆歲除檢還之忽於坊間得一舊鈔見有洞天清錄字樣急收之苦吳本已還無從對勘越乙亥正月四日復向枚菴借歸竭一日力遂手校之舊鈔本序次紊亂并脫古琴辨一門復命鈔

胥照胡本影寫足之以俟續校是冊不盡爲洞天清錄集而有他書附後并雜廁其中俟校畢重裝而以他書附焉存其來厯也乙亥新正五日復翁記是日陳拙安爲余鐫一陽更生印適來卽以鈐於是跋之後印文取一陽更生者蓋卽更號復翁之意其詳見復翁說茲不復贅

在卷首

校本意林五卷二冊

嘉慶丙子二月依道藏本校補脫譌訛菴

道光紀元辛巳冬月士禮居重向讀異齋借此校本  
傳錄一部蓋道藏本已歸藝芸矣錄畢適坊友以聚  
珍本來頗與道藏近特稍有歧異耳想經參酌未必  
悉據道藏矣復見心翁識



校宋舊鈔本東萊先生詩律武庫二冊

此東萊先生詩律武庫二冊舊鈔本余於去年以二  
番餅得之已篋藏之矣頃有書坊以舊刻本來楮墨  
古雅余粗閱一過審爲元刻因索值太昂囊中乏錢  
止許以白金三兩五錢蓋書裝七冊每冊五星未及  
諧而去然心戀其古物不能忍置之會吾友五柳主  
人歸自京其同業必取決於彼詢之果以六番餅易  
得遂從彼取回破幾日工校如前卷中遇叻勃亘等  
諱間避之乃知宋刻非元刻也誌此以見書之難定

如此庚午五月初九日復翁校畢識

乙亥歲除歸藝芸書屋百朱一塵中僅留此鈔本矣

宋本面目略具云爾丙子春正月初三日復翁識

宋板詩律武庫載諸汲古閣珍藏祕本書目余所取

以校是舊鈔者殆卽此刻也宋刻前後二集各十五

卷皆題東萊先生詩律武庫爲首行各有目錄二字

次行題東萊呂氏編於麗澤書院前集有碑牌四行

云今得呂氏家塾手校武庫一帙用是爲詩戰之具

固可以掃千軍而降勍敵不欲祕藏刻梓以原請天

下收書君子伏幸詳鑒謹咨前集卷一慶誕卷二幼  
敏卷三榮貴卷四榮貴慶壽卷五卷六仙道卷七聲  
樂卷八卷九卷十釋學卷十一文章卷十二詩詠卷  
十三十四遊賞卷十五贈送後集卷一卷二酒飲卷  
三儉約名譽卷四才能識鑒卷五識鑒恩德書畫卷  
九靈異卷十雷雨卷十一佳人卷十二曠達卷十三  
感慨卷十四感慨警懼卷十五賢豪茲鈔首標總目  
門類通體不分卷當別一本并間有勝於宋刻者字  
句之間彼或脫佚也卷中原有硃筆校改時有同異



或有合於宋刻者或有宋刻同誤而此以意校改者  
茲校悉誌宋刻譌字亦存真也宋刻每葉二十二行  
每行十九字茲不校其行款者因非一本故兩存之  
宋刻有鈔補或破損未全者茲未明著以此本亦有  
所自非必不可信者也復翁又記

均在  
卷末

明銅活字本開元天寶遺事二卷一冊

此冊爲虞山錢兄楚珩見贈

黃筆無款在卷末

古書自宋元板刻而外其最可信者莫如銅板活字  
蓋所據皆舊本刻亦在先也諸書中有會通館蘭雪  
堂錫山安氏館等名目皆活字本也此建業張氏本  
僅見是書余收之與西京雜記並儲漢唐遺跡略具

一二矣薏夫

在卷首

此書舊藏周丈香嚴書屋中余於嘉慶壬申歲借校  
一過所校者爲埭川顧氏家塾梓行本彼此互有得

失惟是覆嚴州本故重視之卷中向有舊校之字大約據顧本如上卷二葉三行第六字收原作守後七行第五字使原作須九葉八行第三格第一字饒原作乾後七行第二字法原作鐵余借校時尙然不知香嚴身後後人重裝竟將舊校之字攙入殊失活本真面目余得此後出校本證之悉知其妄猶幸余見真本在前可據舊校一一標明也其餘增補鉤乙未經改易存之以見校者手筆差爲可喜憶己卯春香嚴作古遺書分散其目流轉於坊間獨此書不著錄

或疑其家固守或已屬他人竟於無意中遇之雖重  
值不惜矣辛巳三月薨夫

此書估人傳示周氏所開目錄注云某人題籤某家  
藏弄皆自有迹者言之也最後標目一行下有雌黃  
楷字二行余審視之知係義門手書儻起香嚴而質  
之想亦以爲是也又記

宋刻新定續志書籍門有云開元天寶遺事知此從  
刊之桐江學宮本出也

四月朔往訪香嚴季子於水月亭晤言及此乃知重

裴攬入係其仲兄所爲若謝菴猶不致若是之妄謝  
菴出所著羣書綴述相質萃元明以來人著述爲目  
錄之學者以續貴與經籍考子晉之有斧季相去當  
不遠也薨夫又記

均在卷末

虞山見贈兩行卽薨翁所審爲義門筆者卷中有停  
雲文起文寵光長洲茂苑玉蘭堂裴雪懷霜閣十餘  
印固歷經前賢珍襲矣

校宋本湘山野錄三卷續湘山野錄一卷一冊

朱人說部所藏舊本極多卽如此書得宋刻元人補鈔本於華陽橋顧氏又得毛斧季手校本於混堂巷顧氏方幸其兩美必合而毛校本已爲友人易去宋刻元人補鈔本又幾幾乎不能自存因乘此祖本尙留案頭手校一過若者爲宋刻若者爲元人補鈔略著梗概至於行款未及鈎勒蓋有補鈔者則脫失增衍已非整齊無容屑屑爲此也收書之力與年俱退惜書之心亦與年俱衰卽校書之目力心緒亦勉強

爲此書之淚落豈真寶物不常聚耶抑清福果難享也  
也甘止醒人識

毛斧季校本已歸張訥菴宋刻元人補鈔本頃又歸  
藝芸書舍茲重取歸張毛校本覆勘又多添校處惜  
祖本無從印證或當日毛校參以己意或余校有漏  
落也校訖并記復翁

均在卷末

校宋本揮塵前錄四卷後錄六卷三錄三卷餘話二卷  
六冊

壬戌秋七月借試飲堂殘宋本校此前錄四卷薨翁  
丕烈

宋本書籍難得得宋本而又殘缺不全以校時刻卒  
難完善豈不可恨卽如此書前錄三錄俱得全卷後  
錄僅有二卷前三錄皆有二本而卒未完善安得全  
爲之校勘耶乙丑秋又六月十六薨翁記

乙丑秋又六月續以繁露堂藏宋本補校

在前錄  
末卷後





校宋鈔本河南邵氏聞見錄二十卷二冊

嘉靖十三年夏日對宋本校勘一過前本與中間一冊在予家四十年始得輾完可見奇書則不易遇也寶之寶之野竹居士謹記

余向年初欲購書時因交白隄錢聽默聞有元人鈔本邵氏聞見錄在其肆中未及買并未及見也後知售於他所心甚念之然無可蹤跡矣頃檢五硯樓遺書見有錢手校者因傳錄之其校在毛刻上間有此鈔本與校本同者始知此鈔之善又有與校本異而

勝於刻本者當存此鈔之舊余校時雖照錢校鈎抹  
然錢校未知能悉存元鈔面目與否且此鈔已有與  
元鈔合者可知必有所據未敢悉遵錢校爲定本也  
惟是所增幾條及字句有添補處似錢校爲勝則此  
書有野竹居士云對宋本校勘一過者不知又何故  
脫誤矣敏求記有陸其清有宋人鈔本云云在精鈔  
本上安能一旦遇之一證斯鈔也乎壬申十月十二  
日是日交冬第一寒信復翁

以上兩跋均在末卷後

錢聽默手校本余臨校後卽歸諸喬司空巷張初菴

首在卷

者以

在第十一卷末

卷在末後



校舊鈔本河南邵氏聞見後錄三十卷一冊

宋人說部雖有刻本必取其鈔本藏之恐時刻非出自善本故棄刻取鈔也鈔本又必求其最善者故一本不已又置別本也此邵氏聞見後錄鈔本甚精忘其爲誰家物卷中有職思居齋記名之爲職思居本云藏篋中久矣無別本可勘頃五柳主人以曹秋岳家藏本見示鈔手甚舊而取對此本卻多譌謬脫落似但據舊鈔卽以此本爲乙未必全是也因參校一過而著其梗概於此甲戌秋九月三十日雨窗復翁

書於陶陶室

續借張訥菴藏津逮本手校一過雖明知曹本之誤亦一一校入存其真也因思案頭無別本可校遂仍以異處校於此內有灼然可見其誤者不復校於此本上而疑似之間亦間存之至於脫誤彼此互有當並參之若彼勝於此者確有幾條固非曹本無以糾津逮之謬也十月初九錄曹本異處皆從手校津逮本上寫之尙未從曹本逐字細校願以異日畢之復翁又記

道光二年閏三月立夏前三日沈欽韓校讀

均在末  
卷後





校舊鈔本歸潛志十四卷二冊

此鈔本歸潛志忘其所由來已愒置之久矣曾有坊友攜示張青芝手鈔八卷本遂校勘一過復因張本未全又從坊間借得十四卷本鈔本統校之始悉此本多譌舛又有錯入他書凡書鈔本固未可信苟非他本參校又何從知其誤耶且書必備諸本凡一本卽有一本佳處卽如此固多譌舛矣而亦有一二處爲他本所不及故購者必置重沓之本也復翁

余旣手校歸潛志於張校舊鈔二本合者姑以圈識

之而斷之曰是曰誤取三占從二之意也然於金源事未諳所言皆妄耳丁丑夏五浙江湖州之南潯人施北研先生來余家小住五日與談金源事如瓶瀉水無一留停蓋北研以老諸生不利舉業積數十年精力究心於金源一代事迹故能如是也所著有金史詳校元遺山詩文箋金源雜興等著余見其後二種茲屬校此下方某作某者是也

北研自有跋在終卷而附記北研著述於此者亦見一鄉一邑間不乏樸學之士特世無知之者耳卽有

知之者而著述不能使之行是誰之過歟爲之慨然

以上各跋  
均在卷首

癸酉仲冬廿有四日於經義齋書坊見有張青芝手  
錄劉祁歸潛志八卷本取歸與舊藏本對似較勝惜  
無後六卷因憶是坊架上向有鈔本歸潛志全者在  
越日復往取之先校此六卷實優於向所藏者遂竭  
一日半夜力校畢此當留此全本矣適春生吳大來  
訪余云是青芝所鈔渠欲轉購之明日當取張本校  
前八卷也十一月廿七日燒燭校畢時二更餘矣復

翁

在第二冊  
卷九前

丁丑夏六月過復翁家相知十餘年始識面也翁以  
余喜說金源事因出此舊鈔原校與鮑刻略同惟歸  
潛堂記之銅壺此作銅臺向閱鮑本壺字不解曾擬  
改作鞮字今見此臺字乃知舊本之足貴至太宗神  
射之爲太祖神功李純甫卒於元光末王仲見爲王  
廣道猶子良由神川誤記不必校先生因屬綴言不  
揣鄙拙書此北研謹識

校舊鈔本

山居新話東園友聞

一冊

不分卷

壬申春三月復翁手校元刻一過

在冊首

乾隆丙午五月買得此本閱月借松陵楊慧樓進士藏本校對補錄前後序文并卷尾脫葉可稱完本矣  
慧樓淡於功名鈔撮元人說部甚多又集前賢翰墨  
爲昭代叢書續編振奇好古近日鮮有其人矣并書  
於此亦樂吾道之不孤云漫士記

在山居新話卷末

楊瑀山居新話四卷夏頤東園友聞二卷錢少詹補  
元史藝文志曾收之頃從坊間買得此二種是合裝

者皆舊鈔然俱無卷數案其文義非全者當是傳本  
之異至楊瑀書四庫書亦收之夏頤書則未有也山  
居新話錢作新語恐誤堯翁識

在冊末

校明鈔本遂昌山人雜錄一冊

不分卷

崇禎七年六月四明范廷芝異生甫校

商氏所刻譌舛不復可讀此粗愈爾


遂昌山人雜錄余所藏舊鈔本十八行二十七字字體較此略整齊亦係黑格格邊有歲丙子鈔畢五字在最後一葉然未詳其鈔自誰氏卽歲丙子亦不知其何朝也頃揚州書友攜此冊來不第爲四明范氏所鈔可爲珍寶且係義門先生閱本尤足貴重因急收之復取余舊藏本相勘大段此本爲勝然有一二



譌舛亦足互爲校正不揣惡劣用墨筆勘之舊藏本  
審是明代所鈔所云歲丙子若在崇禎朝當是九年  
較此鈔又後也爰並藏以此爲甲而彼爲乙云嘉慶  
歲在乙丑閏六月三日蕘翁黃丕烈識均在卷末  
每葉格心有臥雲山房四字卷首有四明范光字闕  
家藏印貞志堂何焯屺瞻等印商氏一行硃字無款  
當卽義門所識也

校舊鈔本遂昌山人雜錄一冊 不分卷

此鈔本遂昌山人雜錄未知鈔自誰氏其格邊但云  
歲丙子鈔畢亦未詳其何朝之丙子也近得一崇禎  
七年六月四明范廷芝異生甫校本出此校勘頗資  
是正間有此善於彼者當參考云蕘翁



校本穆天子傳一冊

嘉慶乙丑余初見九行廿二字本信爲佳本遂遍借諸家藏本手校於此其最舊者爲叢書堂鈔本然注多刪節故此所校以舊鈔本爲據餘不過備查核也

蕓翁

在卷首

丙寅五月朔書友以范刻穆天子傳求售每半葉九行行十八字每卷次行標晉郭璞註明范欽訂似前所見范本猶翻刻也字大悅目印本清爽惜前人讀過朱墨燦然於闕文口字皆有案語存疑標於上方

楹書隅錄續編

卷三

海源閣

竊思此書在荀勗校定時已病其殘缺郭璞作註間於註中存疑後人安能以意補缺耶通體句讀頗便觀覽因悉臨之其異同處亦用朱筆標注焉

在卷首  
序後

因續見范刻本用硃筆校之復以九行二十二字覆勘悉注九行本間有用墨圈者亦六行本也丙寅五

月三日記

在卷  
首

九行二十二字本校本又與此刻同疑此卽從九行二十二字本出則彼爲明刻之最先本無疑

同時又借陳仲魚所得明范欽吉陳德文校刊本校

一過大段與此刻同而一二處有合舊鈔者并記  
同時又借香嚴書屋藏舊鈔本鈐有叢書堂印本文  
與此刻同與所校鈔本不合且注多節畧似非善本  
聊校存其一二異字蕘翁

校畢此卷已將夕矣余以病軀得間校此雖憂亦樂  
也予病前校書已苦其煩何況病後家人禁勿看書  
者幾卅月矣自下樓後枯坐內書房日聽家人婦子  
料理歲事雖非手親治之耳聞能毋心動乎因借此  
六卷書消我兩日憂轉不覺其煩也大除夕燃燭復


翁識

丙子秋日借元妙觀道藏本校又正數字皆就前校  
影鈔道藏本所誤者餘淨校道藏別有本子  
在復翁  
以上各跋均在末卷後

校本劇談錄二卷一冊

乙丑十月以開萬樓所藏舊鈔本校首多序一篇卷中亦時有一二佳字每卷撰人多官銜皆古式也書以舊爲佳信然卽有譌字可揣而知也薊翁





校鈔本江淮異人錄一冊

不分卷

舊藏嘉靖間伍氏刊本謄脫幾不成書武林鮑綠飲以藏本校正因重錄之馬氏通考陳氏解題俱作二卷然二十五人事迹具在則爲全本無疑乾隆癸卯霜降日延陵吳翌鳳識

鮑校伍氏刊本余亦見之所據以入叢書者非此校本也乙亥春從李氏獲見顧秀野草堂本校於鮑校伍本上茲復謄於吳枚菴手鈔本云復翁

均在冊末

樞言限鈎穆經

卷二

七

海源閣

校本江淮異人錄一冊 不分卷

江淮異人錄一卷傳本甚罕余得此於吳興賈人鮑君以文復從宋刻校正真善本矣辛丑二月吳枚菴

記 在卷末

江淮異人錄向未見有善本此冊藏五硯樓識是枚菴所藏而鮑君淥飲校過者因檢出之是冊刻入知不足齋叢書第十二集

案叢書刻本非淥飲手校本也

檢淥飲跋但

云善本並未言宋刻校正其源亦出於伍本并以爲伍已有改竄未知何據叢書與此本微異其刊成在

楹書隅錄續編

卷三

亥 海源閣

乾隆丁未復在辛丑後不知何以不據是本而又改

易也

案此本未盡善故鮑刻不據此

此云伍忠光彼作伍光忠或係

筆誤枚菴藏本爲淥飲刻入叢書往往著其緣起而

此書不及枚菴名當非是本矣余喜古書雖已經刻

行必藏其舊者況疊經名手校過尤爲可寶淥飲筆

墨不輕與人余訂交二十年來求其手跡卒不可得

得此補闕良慰余懷嘉慶庚午夏季六日復翁記

以下

二跋在卷末

吳枚菴別有乾隆癸卯重錄鮑校本亦爲余所收蓋

原本出於鮑故付梓不云吳本也乙亥元夕前日又記

古書安能盡見卽如此書鮑已得善本校伍氏本矣枚菴云以文從宋刻校正殆未可信枚菴既有此鮑校本復又重錄一清本想已云盡善矣頃子僊以友人求售售之秀野藏鈔本見示予竭半日力校之繼以二更遂畢此觸處多妙處鮑君已作古不及語之吳丈朝夕見當一一告之俾知江淮異人錄尙有善本出鮑本外也特古書深藏恨不能盡見耳今日校

書竟日不致心煩頭脹甚快事也乙亥元夕前一日

復翁

以下二跋  
在卷首

續校鮑刻叢書本非卽初次所校淶飲跋云喜得善  
本特梓以存其舊蓋又一本矣妙處多與顧本合稍  
有異同殊瑣屑也元夕又記

校宋明鈔本茅亭客話十卷二冊

茅亭客話惟毛氏津逮中有之舊本世不多見鈔本則載於汲古閣珍藏祕本書目余於去秋曾得一宋刻卽讀書敏求記所云太廟前尹家書籍鋪刊行本也取校毛刻多所改正兼多石京後序一篇信稱善本茲又從吳枚菴家得錢罄室藏本行款雖與宋刻不同而字之誤者不到十分之一有一二衍字或以意擅改字亦皆與宋刻舊校合蓋宋刻已經俗人塗抹後來傳錄多本於此故適同耳余破雨夜力復用



宋刻真本校勘一過因題數語於卷尾甲子二月晦  
堯翁記

中和重裝去其補蠹蝕痕紙色之不純者斐然可觀  
矣堯翁又記

十月十有三日雨窗無聊整理書籍及此重展一過  
竊幸此等祕本獲一爲難今余兼有宋刻舊鈔何幸  
如之俗人以余好收古書動以洩天地奇祕爲戒憶  
春初遭大兒之變親友勸余勿再收藏然余反藉此  
消遣故校此書時猶在大兒七中夏秋以來心緒畧

定不謂九月下旬又值伯兄去世倫常間多不如意  
事造物之忌其果然耶而余藉此消遣之計仍如故  
也爲之破涕爲笑薨翁又記

壬申仲冬九日訪友至胥門因觀坊間所收吳稷堂  
書內舊刻名鈔絕無創獲遇稍舊者賈人已拔置別  
儲一處矣余至請觀見目標默記而注九冊心疑是  
書不應如是之多索其書乃彙鈔各種而適存九冊  
也默記特其中一種耳中有茅亭客話取歸與此對  
較此鈔本爲佳往往與宋刻合此本外又益一舊鈔

矣復翁丕烈

此書宋刻近亦轉歸他所所藏惟此及穴研齋鈔本  
矣論字之與宋刻合穴研齋本爲佳若要存宋刻面  
目則此手校者爲勝矣舍刻論鈔二本不相上下也  
戊寅元旦雪窗記宋塵一翁

均在  
卷末

卷首目錄後有賣衣買書志亦迂愛護不異隨侯珠  
有借不返遭神誅子孫嚮之何其愚木記卷末有錢  
穀叔寶吳枚菴流覽所及各印

校本段少卿酉陽雜俎前集二十卷二冊續集十卷一冊

乙亥夏吳丈枚菴於新交處借一明刻本酉陽雜俎前集續集俱全既自校矣又轉付張訥庵校之余卽從訥庵借其手校本校於明刻新都本上訥庵云前集頗佳續集與汲古本不甚異且余所藏新都本止二十卷故借校止前集云張本從內鄉李雲鵠校本補趙琦美序又補宋嘉定時人二序又淳祐時人一序皆未之傳錄惟趙序煞有關係知此二十卷源流

實出於宋刻又出於校勘故與此新都本迥異又與汲古本亦殊就所見本此較勝矣趙因得續集而又得前集蓋琦美之堂兄可庵於歸翁繆含齋可貞氏處轉錄岷山俞質夫先生宋刻雜俎前集琦美又校三四過錯誤分合補脫正誤不可指屈并爲搜廣記類書及雜說所引隨類續補嘉禾項羣玉氏復以數條見示續所未備噫此趙本之雜俎耳姑臨校以俟宋本可耳復翁臨張訥菴校本訖并記

在前集第十二卷前

酉陽雜俎無宋元刻及舊鈔故所儲止明刻焉明刻


別有內鄉李雲鵠校本雖出自宋刻而增刪已經動手所謂趙本也校如右

續以五柳居每葉二十行每行二十三字本校趙本

異字有與同者加黑圈識之復翁

均在前集末卷後

續集十卷未校卽前集所據之李雲鵠刻本想經復翁配入者也



校明鈔本錄異記八卷一冊

右錄異記一集凡八卷十七類乃五代杜光庭所纂得於友人家假歸錄出仍鈔別本總計七十翻時正德己卯三月望後一日吳門柳僉大中錄畢於桐涇別墅之清遠樓中其日細雨閉門弄筆強述一章以記之

鈔書與讀書日日愛樓居窗下滿池水萍間卻餌魚時名隨巧拙天道已盈虛莫信村居好山居樂有餘己卯首夏訪大中村居承假是錄錄畢用書尾原韻



奉謝

生平酷好書僻性懣城居洗杓嘗鴟酒焚芸辟蠹魚

荷君函裏祕益我腹中虛好語田園輩辛勤廿載餘

端陽後二日長洲守約道人俞弁志字子容著山樵暇語十卷案此

注用墨筆審其字似是義門手迹

萬厯己丑首夏趙子元度訪予齋居欲得文中子元

經予舉以贈之因語予近得杜光庭錄異記凡八卷

予請借觀去數日錄一冊見贈據前二跋距正德己

卯又七十一矣元度爲今大司成定宇公冢器翩翩

好古言論風旨綽有父風蓋後來之俊云是歲端陽  
後二日酉巖山人謹識

方書此時亦漫然耳至六月廿日復觀之乃與前跋  
俱端陽後二日事之偶合如此亦異矣哉酉巖并書

酉巖名四麟案此注用朱筆當是  
堯圃所記以上各跋均在卷末

杜光庭長安人應九經舉屢不第思欲脫屣利名道  
遙物外會僖宗幸蜀以蜀中道門牢落思得名士以  
振之時潘尊師道術甚高僖宗所重光庭數下闕僖  
宗駕回詔尊師於兩街求其可者遂以光庭應詔僖

宗召問稱旨卽令披戴仍賜紫衣號廣成先生馳驛  
赴蜀及王建據蜀待之尤厚又號爲天師光庭嘗以  
道德經注者雖多未暢厥旨因著廣成義八十卷他  
術稱是識者多之右出陶岳五代史補己丑季夏酉

巖子錄

在卷首

余生五十三年但知有安愚而不知有守約今乃并  
得讀其詩二老風流可愛他日誌耆舊者當訪其事  
蹟存之也康熙癸巳焯識

嘉慶乙丑夏六月十三日有事入山便道至閬門留

耕書稜訪揚州書賈因出舊鈔書數冊示余余所檢者此爲最佳卷尾綴柳俞二公詩想見昔賢留心書籍往往寄情吟詠與吾儕三益聯吟時所爲題書記事詩先後同揆也興之所至繼賦一律云

爲欲訪名書尋蹤到客居刻虞鵠類鶩鈔怕魯成魚善本讎非妄前賢愛不虛一編真可寶可以概其餘  
蕘翁黃丕烈

柳俞去後趙秦來二老風流亦異哉獨有髯何誰與

繼宋塵今日卷重開

此書先有柳安愚俞守約彼此唱和後有趙元度秦西巖彼此

授受二老風流得替人矣惟義門學士後無有  
手迹留此書者今入余手屢加校勘妄思繼之

四卷奇書出道經秋宵校閱一燈青酒杯孤負中秋

月細雨空庭笑聚螢

校此書適在中秋是夜無月宋坐堂中看兒女輩聚螢爲樂

座一翁

以上各跋均在卷末

卷首末有秦季公西巖山人四磨逍遙生樵李曹氏  
藏書印曹溶咸陽一布衣又口齋收藏圖書印各印  
歷經諸賢題詠名迹燦然亦珍笈矣

校宋本道德真經指歸十三卷二冊

嘉興刻道德真經指歸是吾邑趙元度本後從錢功甫得乃翁叔寶鈔本自七卷訖十三卷前有總序後有人之譏也至信言不美四章與總序相合其中爲刻本所闕落者尤多焦弱侯輯老氏翼亦未見此本良可寶也但未知與道藏本有異同否絳雲餘燼亂帙中得之屬尊王遣人繕寫成善本更參訂之辛丑除夕牧翁記

亂帙中簡出道德指歸耑人馳去此夕將此殘書商

推良可一胡廬也諸侯獻歲面言謙益再筆

此書亦出郡城顧氏而忘其爲某房矣頃顧氏爲任  
蔣橋一房分支而遷居在濂溪坊者有書欲消余往  
觀之於叢殘中檢得嚴君平道德指歸論係錢東澗  
手跋本內黏附與尊王之札一條想經尊王繕寫旣  
成而倩東澗跋之以原札附入之本也後書主欲併  
他書總去爲他人所得余蹤跡是書所在假歸覆勘  
中有一二誤字及脫校處復用朱筆正之校畢因記  
時嘉慶甲戌秋重陽日也復翁

道光癸未張訥菴從余借此本臨校頗以此本脫誤  
尙多卽余復校錢跋本亦未盡思得道藏本校一過  
方愜所願親往天慶觀借之含糊答應竟以未有爲  
詞此言入於吾耳余連年入夏病暑諸事不適視青  
籍如仇矧校勘耶故訥菴之請久無以應交秋精神  
漸復遇事喜爲近校范石湖集二冊過而興未已遂  
從觀中借得道藏本手校自十四至十六午時畢其  
覆校則全賴訥菴之眼明手快也堯夫

道藏本能字號計十一卷其能一至能四爲李約道



德真經新註其能五至能十一爲道德真經指歸前  
有序空一格序後接君平說空三格標目其說亦空  
一格間半葉提行標目次行標撰人註人空四格又  
提行頂格標經文後接指歸空一格通體皆同每卷  
爲一冊每紙一幅摺五幅每幅五行每行十七字茲  
就道藏本行款鈎畫儻就校勘款式尋之似可仍照  
道藏本錄出庶幾與同讀是書者參之癸未重陽後  
七日堯夫識

古人愛書如命故獲一異本雖殘帙亦轉相告語其

情事今猶古也然書本子一本有一本之面目非得  
真本卽盡善矣安得謂之盡善乎所以東澗於此本  
錢叔寶鈔者已爲可寶而猶留一道藏本在想望未  
見之中是真能知書者今余何幸而所見勝於東澗  
東澗當日有遵王互相商確引爲同調而余適有訛  
菴借校因思道藏之本余能遂訛菴之願且訛菴又  
能補余校之漏可見愛書者尤不可不愛友也九月  
下澣五日訛菴補校疎略訖揀還復書此以誌秋清  
逸士

道光癸未九月十九日重對道藏本覆勘一過訂菴

均在  
卷末

校宋本列子八卷二冊

此所校宋本列子殷敬順釋文未行以前本也其中  
間附作注者舊音此本字句往往與釋文所云一本  
作某者合洵古本也惜中多脩板及鈔補處一一注  
明而通體描寫粘補字不無涉而致誤矣丙子堯夫  
記

校訖并鈎勒每行起訖前二卷於小注不到底者亦  
鈎勒之三卷後止鈎勒到底行款矣

校宋本訖偶檢盧抱經羣書拾補有專校列子張湛

注其所校都有與宋本合者用墨圈識之而余因取拾補爲證復取宋本讎之又得數字始知校書不易讎書爲急也天壤間物莫能兩全能讀書矣而不能藏書故雖能讀書如抱經而所見非宋刻故區別釋文於張湛注外如賈逵姓氏英覽用綦十二故二條尙誤仞釋文爲注坐藏書不多故也而余幸藏有宋板矣坐不能讀書故藏宋本列子二十餘年未經用力直至日莫途遠始究心焉得無爲炳燭之明乎書此誌憾時丙子五月二十二日薨夫又記

均在末卷後

校鈔本鳴鶴餘音九卷三冊

此舊鈔鳴鶴餘音八卷標隨一至隨八字號乃道藏

本也檢道藏目錄詳註卷四隨字號計九卷鳴鶴餘

音

卷一之九仙游山道士彭致中集諸仙詩歌詞賦

據此則是本尙缺第九

卷也余以語古舊藏珍之語古爲何義門家齋名義

門所藏亦僅止此去冬從嘉禾友人處得一刻本首

載重刊鳴鶴餘音序與此字句微有不同而卷中所

載與此全異必非彭致中所集書矣自當以此爲準

庚午夏五中澣八日梅雨悶人檢書及此因記復翁

丙子夏從天慶觀借道藏本補全并校此八卷越十月十有一日統畢續補者當別裝附後云

丙子十月從天慶觀借道藏本補全并手校此本此本藏自語古齋中有補錄虞道園和馮尊師蘇武慢十二首譌字獨多知非補自道藏本也前行記一篇後羨無俗念一首悉從道藏本正之此脫八卷尾及第九卷以別紙照道藏本補全焉宋塵一翁記

均在第八

卷後

楹書隅錄續編卷三終